

Mid-Day Dogri News Bulletin, 29th June 2025

समे — 12:25

<><><><><>

PM MKB

प्रधानमंत्री नरेन्द्र मोदी होरें अज्ज अपने मन की बात कार्यक्रम दे राहें देश—बदेश दे लोकें कन्नै बचार सांझे कीते। श्री मोदी होरें जंदी 21 जून गी मनाए गेदे अंतर्राष्ट्री योग दिवस दे बारै च चेचे तौर पर गल्ल कीती। योग सरबन्धी अंतर्राष्ट्री ध्याड़ा मनाने दी शुरुआत 10 ब'रे पैहले कीती गई ही ते हर ब'रे योग कन्नै जुड़ने आहलें दी गिनतरी लगातार बधदी जा करदी ऐ। प्रधानमंत्री होरें देश ते दुनिया दे बक्ख—बक्ख हिस्सें च योग दिवस दे कार्यक्रमें बारै गल्ल कीती ते आखेआ जे उ'नेंगी पूरा जकीन ऐ जे योग दी भव्यता मते कोला मते लोकें गी एहदे'नै जुड़ने लेई पक्क गै प्रेरित करोग। श्री मोदी होरें देसै दे बक्ख—बक्ख हिस्सें च चलने आहली धार्मिक जात्तराएं दा जिक्र कीता। मोदी होरें औंदी 3 जुलाई थमां शुरु होने आहली श्री अमरनाथ जी दी जात्तरा सने भगवान जगन्नाथ हुं'दी रथ जात्तरा दा बी जिक्र कीता जेहदा धार्मिक महत्व लगातार बधदा जा'रदा ऐ। प्रधानमंत्री होरें 25 जून सन् 1975 गी मुख्य पर थोपी गेदी एमरजेन्सी बारै बी विचार सांझे कीते। उस डरौने समें गी चेतता करदे होई मोदी होरें आखेआ जे एमरजेन्सी लाना, संविधान दी हत्तेआ करने दे बरोबर हा ते ऐसा करने आहलें दा इरादा न्याऽपालिका गी बी अपना गुलाम बनाई रखने दा हा। अपने मन की बात कार्यक्रम च अगगे प्रधानमंत्री होरें असम दे इक प्रमुख खेत्तर बोडोलैंड दी बी गल्ल कीती। उ'नें आखेआ जे बोडोलैंड जेहड़ा कदे संघर्ष लेई जानेआ जंदा हा पर अज्ज उत्थुं दे युवा, खेड्डें दे दम उप्पर अपनी ते अपने इलाके दी इक टकोहदी पन्छान बना करदे न। प्रधानमंत्री होरें मेघालय दी एरी सिल्क दा जिक्र कीता जिसी किश दिन पैहले गै जीआई टैग हासल होआ ऐ। एहदे अलावा प्रधानमंत्री होरें भद्राचलम दिएं महिलाएं आसेआ बनाए जा'रदे श्री अन्न बिस्कुटें, कर्नाटक दे कलबुर्गी दिएं महिलाएं आसेआ बनाई जा'रदी ज्वार दी रूट्टी ते इ'दे राहें दित्ते जा'रदे वोक्ल फॉर लोकल दे संदेस दा बी जिक्र कीता। श्री मोदी होरें अंतरिक्ष च भारत दे बधदे कदम दा जिक्र कीता ते खासतौर उप्पर ग्रुप कैप्टन शुभांशु शुक्ला हुं'दे बारै गल्ल कीती जेहड़े अंतर्राष्ट्री अंतरिक्ष स्टेशन पुज्जने आहले पैहले भारती बनी गे न।

<><><><><>

LG-Amarnath

उपराज्यपाल मनोज सिन्हा होरें औंदी श्री अमरनाथ जी दी यात्रा दे प्रबंधें पर चर्चा करने आस्तै नागरिक समाज दे संगठनें दे सदस्यें, धार्मिक नेताएं, निर्वाचित प्रतिनिधिएं ते बपारी ते कारोबारी समुदाय कन्नै इक बैठक लाई। मुख्यमंत्री उमर अब्दुल्ला, मुख्य सचिव अटल डुल्लू ते होर दुए वरिष्ठ अधिकारिं बी इस बैठक च हिस्सा लैता। उपराज्यपाल होरें समाज दे बक्ख-बक्ख वर्गे दे सुझाएं दा सुआगत कीता ते पवित्र तीर्थयात्रा दे बवस्थित संचालन गी जकीनी बनाने आस्तै उंदी सक्रिय हिस्सेदारी ते सैहयोग दा आग्रह कीता। उनें आखेआ जे श्री अमरनाथ जी दी यात्रा सच्चें गै इक आम जनमानस दी जात्तरा ऐ, जेह्दे च हर इक बसनीक इस पवित्र तीर्थ यात्रा दा इक प्रमुख हितधारक ऐ।

<><><><><><>

CM Golf

मुख्यमंत्री ओमर अब्दुल्ला होरें जम्मू-कश्मीर गी देसै च गोल्फ सरबन्धी सब्बनें शा बधिया थाहरें चा इक्क बनाने दी अपनी सरकार दी वचनबद्धता गी फही पक्का कीता ऐ। श्रीनगर च राष्ट्री स्तर दी गोल्फ टूर्नामेंट दे मगरा पुरस्कार बंड्डने आहले समारोह दरान बोलदे होई मुख्यमंत्री होरें खड्ढारिं दा सोआगत कीता ते इस किस्मै दे आयोजन लेई फिक्की दा धन्नवाद कीता। ओमर होरें हाल दिएं चुनौतिं परैन्त खित्ते च सैलसफा खेत्तर च नमें सिरैया जान भरने च इत्थे औने आहलें दे अनुभवें दी ताकत पर चेचा जोर दित्ता। गुलमर्ग, श्रीनगर ते जम्मू आहले गोल्फ कोर्स च जारी कम्मं पर लोऽ पांदे होई मुख्यमंत्री होरें जकीन दोआया जे जम्मू-कश्मीर गी पक्क गै गोल्फ आहली इक बेह्तरीन थाहर दे तौर पर स्थापित कीता जाह्ग ते इत्थे औने आहले गोल्फ पेशेवरें गी आलमी स्तर दिआं बेह्तरीन स्हूलतां उपलब्ध करोआइयां जाडन।

<><><><><><>

Rana Dachigam

जम्मू-कश्मीर दे जंगलात मैह्कमे नै प्रबंधन प्रभावशीलता मूल्यांकन अभ्यास तैह्त डाचीगाम नेशनल पार्क लेई 92 इशारिया 9-7 फीसद स्कोर कन्नै अव्वल थाहर दी उपलब्धि हासल कीती ऐ। एह् अभ्यास पर्यावरण, जंगलात ते जलवायु परिवर्तन मंत्रालय तैह्त भारत दे वन्य जीवें सरबन्धी संस्थान आसेआ करोआया गेआ हा। जंगलात मंत्री जावेद राणा होरें इस बड्डी उपलब्धि लेई वन्यजीवें सरबन्धी मैह्कमे दे अधिकारिं दी सराहना कीती। उ'नें आखेआ जे जम्मू-कश्मीर दे होरनें इलाकें च बी इस उपलब्धि थमां सबक लेंदे होई इस्सै मय्यार दे कम्म कीते जाने लोड्चदे न। मंत्री होरें इब्बी आखेआ जे डाचीगाम नेशनल पार्क, मुख्य भरै दे 438

संरक्षित इलाकें च, इन्नी बधिया कारकरदगी दस्सने आहले इलाके दे तौर पर उभरियै सामने आया ऐ।

<><><><><><>

CS Family IDs

मुख्य सचिव अटल डुल्लु होरें कल श्रीनगर आहले सिविल सैक्रेटेरिएट च इक उच्ची सतह दी बैठक लाइयै जम्मू-कश्मीर च हर इक परोआर लेई विशिष्ट पन्छान आहली परोआरिक आईडी कायम करने शा पैहले आहली जरूरी तैयारिएं दी समीक्षा कीती। इस पैहल दा मकसद सार्वजनिक सेवाएं दी दस्तयाबी गी चुस्त-दुरुस्त बनाना, लाभार्थिएं दी पुज्ज दा विस्तार करना ते बक्ख-बक्ख सरकारी मैह्कमें च योजना ते निगरानी लेई इक भरोसेमंद जरिये गी स्थापित करना ऐ। बैठका दरान मुख्य सचिव होरें विशिष्ट पन्छान आहली ऐकड़ी परोआरिक आईडी दी सकारात्मक समर्थ उप्पर लोऽ पाई।

<><><><><><>

Dogri Song

कुंवर वियोगी मेमोरियल ट्रस्ट, डोगरी संस्था जम्मू ते जेएंडके एक्स सर्विसमेन लीग आसेआ डोगरी, हिंदी ते अंग्रेजी च जय डोगरा नांऽ दा पैहला देशभक्ति गीत जारी कीता गेआ। एह गीत, कश्मीर दे रक्षक खोआने आहले ब्रिगेडियर रजिंदर सिंह जम्वाल ते 1947 च उं'दे कन्नै कश्मीर दी राक्खी करदे होई सर्वोच्च बलिदान देने आहले 100 डोगरा जोद्धाएं गी समर्पित ऐ। कुंवर वियोगी हुंदी रचना थमां प्रेति इस गीत गी ब्रिज मोहन होरें बड़े असरदार ढंग्गै'नै तैयार कीता ते इस गीत गी बीएसएफ दे जवान रियाज़ अहमद होरें कल डोगरी भवन जम्मू च लोआए गेदे इक समारोह दरान गाया।

<><><><><><>